

太一丛话卷一

一 黎美周

明德既夷 诗道杂乱 黎美周起于番禺 大有起衰救弊之思。其为诗不轨常律 然纵横排荡 不可一世。徐巨源至谓 万历五十年无诗 滥于王李 佻于袁徐 纤于锺谭 乃今独见美周。读之如春风骀荡 夏云崔嵬 如坐百花 杂听箫韶 剑客翾动 左右推崇之 至于如此。美周字遂球 著有《莲须阁集》。《花下歌云》：“生平不事求神仙 愿上东海求仙船。童男童女各三千 教之歌舞及管弦。逍遥行乐二十年 遂令婚配同力田。可得万人驰九边 大雪国耻铭燕然。老夫须眉图凌烟 结屋花国临酒泉。名儒侠客列四筵 等闲诗赋人争传 乞得一字十万钱。”《欢闻变歌》云：“镜破面自圆 谁能破侬面。天地纵反覆 侬亦与欢见。”《少年行》云：“年少传闻十二州，报人讎尽转多讎。经行不用变姓名，醉卧胡姬卖酒楼。”

美周少年《赋黄牡丹》诗 郑超宗主课拔为第一 时目之为“黄牡丹状元”。赣州之难 与杨廷麟、万元吉、彭期生、刘同升、姚奇胤同以身殉 可不谓烈哉。

二 杨廷麟

杨廷麟 字伯祥 尝著《秋兴四律》云：“北湖菱叶近渔家 烟浦荒荒雁路斜。湿鸟立沙闻社鼓 野人当户饲田瓜。月明露上蒲萄蔓 夜静风生蓼荡花。怅望故园溪外渡 一声横笛冷蒹葭。”“司户祠前一骑回，边烽未举嫚书来。汉臣独有和戎策 楚子谁称执政材。半壁但愁军饷乏 三关不睹阵云开。最怜风雪卢龙塞 换取牙门酒一杯。”“疆弩将军七万营，银鞍金甲耀东征。市儿果锐轻言战 上相安危慎用兵。海鸟自啼狼虎岭 妖星空照凤皇城。河西百里无消息 又道青山夜火明。”“汉家岁岁戌居延 新筑浑河北斗边。文学未谙《盐铁论》 公卿谁进度支钱。高城寒听菰蒲雨 战骨秋枯苜蓿田。壮士不闻还易水 至今宾客泪潸然。”

感世伤时 音节繁苦 诵之惘然。又《诸葛武侯祠》云：“霸气西南日 尝闻屡出师。才为王者佐 学与古人期。柏剩一孤树 桑移八百枝。中原仍帝魏 遗恨史臣词。”

三 万元吉诗一首

万元吉游月岩，《谒周元公庙》诗云：“中岁不闻道 泛泛逐萍梗。缅怀先哲型，沉忧不出颍。兹来瞰岩月，鬼斧凿天影。尺窦泄素云，一星射瑶井。物理竟何如 遐迹忽深省。元公昔幽憩，万虑悉以屏。阴阳动静初，澄心得妙领。于焉瞻

遗庙 百世尚严整。冥心无极前 衣露遍清冷。’万字吉人 江西人。

四 彭期生诗一首

彭期生 字观民 海盐人。起家进士 历官江西按察使，分巡岭北 城破自缢死。著有《弱水山人诗集》。

《送秋》云：“悲秋秋去转堪悲 枉复登临赋楚辞。远壑水残斜照敛 荒原烟冷朔风吹。天边白雁迷消息 月下清砧感别离。蟋蟀似能占物候 寂寥一夜傍床帷。’君之死也 守备杨大器潜以其骸瘞之于万安县之百花村 世无知者。后竟为其同乡访得以归 倘忠义之所感欤！

五 刘同升

刘同升 吉水人。崇祯丁丑以进士第一人及第 福藩立授左中允 不拜。丙戌抚州失守 遂与杨公廷麟首倡义旅 恢复临江。唐王闻之 拜为右詹允 晋兵部侍郎 总理江西军务。城陷 死焉。或谓有宋以来 状元及第死国事者 宋得三人 何□、文天祥、陈文龙 明得五人 黄观、曹鼐、刘理顺、余煌 其一则同升也。为科甲中人 可因此一雪积耻矣。《由百花溪登玉笥山古风》一首云：“朝看山出云 暮看云入笥。山行若无溪 恰有青童至。指点绝壁间 仙台藏胜地。藤枝匪易攀 屐齿犹可置。日午闻鸡鸣 岩椒启金字。出险坡渐平，

划然人境异。连峰涌下界，扑面耸层翠。因过丹灶厂，纵览紫微志。白花雨外明，红果林间坠。晚食供芋魁，晨铛倒茶柜。坐久慵下山，踟蹰想真寄。尘网讵得辞，幽兴偶然遂。”

意颇超脱 苏玉局所谓无蔬笋气者也。其《入峡出峡》等诗 时或似之 君字孝则。

六 姚奇胤《秋夜》诗

姚奇胤著有《草玄堂诗集》。《秋夜》云：“遥夜苦无寐，起视明月光。凉风天上来，随月入我堂。披衣步前除，独立以徬徨。蟋蟀既已鸣，鸿雁亦来翔。感此时物变，怨彼去日长。生非金石姿，安得恒寿康。忧来不可辍，慷慨吟此章。”读之大有伤生悼世之意。君钱塘人，字有仆。

七 黄幼玄

黄幼玄道周，漳州镇海卫人。唐王时，以大学士奉命督师。旬日间，号召忠义之士万有四千，与万元吉、杨廷麟江西之师相犄角，倘人心思汉，亦毋难一战而还故鼎也。毋何至，徽州兵溃，为婺源令，某所诱执，绝粒四十日不死。夫人蔡氏闻之，遗以书云：“忠臣有国，毋以内顾为念。”迨临难时，犹裂衿，啗指血，书数语，报家人曰：“纲常万古，节义千秋。天地知我，家人无忧。”何其授命之从容也。著有《西湖忠烈祠迎神送神曲》云：“雷鼓阗兮龙在野，云披离兮龙血下。龙上

天兮星无光，椒糈媮兮兰不芳。灵之集兮四国，鸿八蹄兮麟九翼。凌沧漭兮拍白日，踟徂征兮何不得息。归休兮此堂，水周兮中央。寒鸡蒞兮菖蒲，罗八珍兮琼浆。骖素虬兮骖文鸯，柅灵车兮紮灵马。执灵袪兮泪盈，把珮琚兮洒洒。昼不足兮宜宵夜，维舟兮鏐筵。新夫君兮王正年，灵参差兮无后先。澹眉须兮驭青天，灵何为兮惛惛。”

昔屈正则栖玉笥山 作《九歌》至《山鬼》篇成 四山忽啾啾若啼，此文步武正则，西湖诸忠烈未知对此何如也。

八 金子俊

休宁金子俊，崇祯戊辰进士也。在馆时读书穷昼夜不休，同侪辄目笑之。告病归里，未几复奉命补修撰。故事修撰专授进士第一人，及第者子俊以他官迁此，盖异数也。甲乙之交 遭国变 遂从故里竖义旗 分兵扼六岭以拒我兵。贵池吴应箕、宣城麻三衡时亦起兵应之。会降御史黄澍入城为内应 城破 遂死之。未死之前日 作书遗长兄云：“生死祸福皆有天命，我等唯顺受之而已，不能逃远。我为家国事勤劳死者 死得其所 即流离散亡 亦流离散亡得其所。弟日内静观之 殊亦不大惨凄 视死真如归 可见平日学道得力。今为郡事未定，不得不忍死在此，毋令内地有惨变。将来我误郡人 使郡人糜烂 是弟贻误郡人也。闻兄等前积薪于屋 俟有急即举火自焚 此学道人 弟所欣羨也。”与长男书云：“尔在家中，不必惊惶。当此国家大变，人民惶乱，不能自保之时，

不得其所者多矣。如我三月为国勤劳，今一旦得正而毙，自不枉我。自闰六月来，一身久如浮云，今无一毫系念，但念郡事未定，此心实实不安。倘百姓安堵，则我瞑目矣。又谓大丈夫不欲自尽，自尽非大丈夫事。吾国之三公不可辱于口，此中自有道理，我丝毫不乱。”云云。

子骏自谓学道得力，观此益信其非谩言也。有遗著一律《送云庄师至吴门》云：“斯文未坠地，夫子独栖迟。论易真传在，从先与俗移。片云常自远，孤鹤去何之。别后时相忆，云山不可知。”子骏名声，有《金太史集》。

同郡诸生江天一者，少深沉多智略，子骏既起义，辟为参事，相与计划一切。迨城破，挥天一去曰：“若有老母在，毋从我死。”天一归拜其母及祖庙，追及之，曰：“焉有与人共事而逃其难者乎？”行至某所，天一日：“一泓清绝，正足怡人。”子骏曰：“大丈夫死即死耳，当与天下共见之。”天一肃容曰：“谨受教。”既至江宁，我朝劝其降。天一昂首曰：“我为若计，不如速杀我，我不死，必复起义。”出通济门，南向再拜，呼高皇帝者三，然后就刑，亦奇男子哉！

九 吴次尾

贵池吴次尾少豪俊，负大志，喜面折人过失，陈同甫一流人也。名虽不登朝籍，而人材之邪正，国事之得失，了如指掌。所谓小东林者，实公倡之。会金子骏起义，次尾即号召雄俊为声援，兵败死事之日，语行刑者曰：“吾死勿去吾冠，

将以见先人于地下也。相传其受命处血痕至今犹熊熊有光云。次尾著述甚富 录其《悼吴门文相国》一什云：“相国信公裔 大庭遭遇同。金闺十五载 凛冽标清风。一朝遽爰立 身通道反穷。时方工谣诼 安能久置公。去国怀明圣 忧心日忡忡。黯淡吴阊邑 凄凉象纬中。斯人不可作 世已摧华嵩。”其他《练乡勇》诸篇亦多苍楚激越之音。

一〇 麻三衡

又有麻三衡者 字孟璿 少注名复社 亦负诗词名。五律《赠钱月圣》云：“不寐成搔首 萧然独寤歌。霜天砧响急 庭树雨声多。酒力三更缓，愁心万绪过。钱郎恋明主 献赋意如何。”《春兴》云：“二月新雨歇 春流始到门。丛筠连昼暝，新燕掠波翻。山静鹿无迹，林香风满园。中原多转战，几处欲招魂。”其他佳句 五言如：“落日照荒野 亡猿怀故林。魂消分剑日 心折覆巢时。一身去乡土 双泪满沧洲。”七言如：“吴儿望岁惟呼雨 楚客忧生尽忆家。梦回塞上双流泪 家在淮南独倚楼。万山茅屋白云满，十里勾溪红叶飞。”皆可诵也。金子骏兵起，麻亦为倡议响应者之一人。事败为我朝所执 以弃市论。

一一 温璜

乙酉，大清兵之下金陵也，与金子骏同时分兵据徽者，

尚有乌程温璜。璜司李徽州，日闻国变，恒引佩刀叹曰：“此身当付汝。”城破，手刃其女及妻，遽自刎死。著有《贞石堂集》。《寄友》云：“灵隐峰前手暂携，千章新绿子规啼。眼边流水春重到，别后停云思几迷。俯听露珠传点画，静闻药裹急刀圭。殷勤简付遗方法，茹淡安绿缓杖藜。”璜，乌程相国之弟也。注名复社，最早时，流卒不以其兄故，而摈斥之。

一二 凌龙翰

歙人凌龙翰（駒）当大清兵南下，方以监察御史巡按河南，监诸镇。闻警，即星夜驰入归德城，誓以死守。迨内量道济之沙，外绝贺兰之救。师溃，仰药自裁不殊，自刎不殊，遂偕从子润生单骑造我清垒。清师诘之曰：“御史私渡河，复抗大军何也。”曰：“以大明之官归大明，何云私？职授监军，恨不得一战死，何云抗？”清帅默然，手金爵侑之酒，曰：“吾天性不饮也。”赠大帽貂裘革舄，后掷之于地，新学道蔡凤、监军道吴汝琦于前，以恐怖之。曰：“吾已办一死来矣。”因自缢死。遗书致我清，有云：“愿坚守盟好，慎勿南下。否则，扬子江头凌御史即钱塘江上伍相国矣。”润生亦从死。其决绝词云：“鞠旅陈师誓大川，时乎不济怅徒然。沙场偃卧余长啸，叱驭青虹问上天。”公答诗云：“艰难历尽竟徒然，撒手长归那问天。自古文山能有几，不如仗节学平原。”

一三 陈子壮和陈子升

陈子壮字集生，一字秋涛，南海人也。李成栋据广州，集生号召舟师数万，复沿海诸郡县。贡士朱维士率义旅自上流应之，遂悉兵登岸，围广州城数匝。适暴风雨骤至，舟飘摇不得附岸。成栋出铁骑蹙之于水次，一军尽溺。集生亦靖节。著《云淙集》。《春日侍诸父老泛舟桃花坞》云：“欲作郊居即瀼西，红芳十里胜金堤。不知南汉千年苑，列入东风几曲溪。负局客来鸡犬吠，和歌谁伴乳莺啼。清时群从多游好，岂是秦人世外迷。”永历三年，赐谥文忠，赠番禺侯。

集生没后，其弟子升收其遗众，据花山岛，与杨光林、王兴号绣花针者，各拥众数万，相犄角。成栋反正，始释兵。入覲，授兵科给事中，嗣改礼科右给事中。其诗非乃兄所可及，古体规仿玉台，五言学太白，时亦瓣香孟襄阳。有《中洲集》，顺德薛始亨为之序而行诸世。《昔昔盐》云：“鸳鸯帘外乌欲栖，玳瑁梁间燕吐泥。月晕圆随汉东蚌，天河倾向汝南鸡。万方仪态华灯出，一笑横陈翠帐低。愁见晓鸿征塞北，不知天将定辽西。”《南中塞下曲》云：“胶寒竹箭犹扬越，笛散梅花已汉关。小月阵前云出塞，骨都营外火连山。江边玉帐楼船渡，马上金钱御府颁。百尺高楼两铜柱，汉家何日拓南蛮？”《游峡山》云：“轩辕二帝子，弄笛开禺阳。江岸扁舟客，闻钟到上方。仙灵今寂阒，云水空青苍。欲遣愁心去，猿声岭外长。”《西樵大科峰》云：“樵峰七十二，秀出一峰尊。策杖观朝

日 浮澜动海门。孤松生岛外 片雨落山根。吾欲骖鸾去 凭虚望帝阍。”数诗皆脍炙人口者也。乔生子升之字。

一四 张家玉与张家珍

东莞张家玉 字玄子。李成栋陷广州 玄子与陈子壮等后先起义。我兵猝至 玄子督阵过水次 马惊坠水死。诗才亢爽 著有《遥夜怨军中遗稿录别》。《和李定夫》云：“鸳鸯戏清池 两两常相倚。羽翼临当乖 风波中道起。相对尚难知，何况万余里。来亲去者疏 毋为贵君子。予怀抱区区 君谅执高谊。”《途中感旧》云：“灯下灯姬月下筵 风流曾泛太湖船。如今万里神京隔 回首西风忆往年。”《闺思》云：“竹林啼鸟遍春晖 何事行人尚未归。惆怅夜来窗月白 梦魂飞不到金微。”又有七言云：“真同丧狗生无赖 纵比流萤死有光。”尤足瞻其身世。

玄子有弟曰家珍 字璩子 有《寒木楼遗诗》。年十六随玄子履戎 行骑黄马 摧锋陷阵 莫敢撓其锐者。马死 哭之，恸吊以诗云：“久失飞黄马 空余血战衣。可怜横草后 不得裹尸归。力尽犹追逸 功高几溃围。年来生髀肉 梦尔泪频挥。”

一五 陈邦彦父子

顺德陈邦彦字会斌。广州之围 我清知谋出于公 求其

家获其妾沈氏、子男二，厚遇之，为书招降，公判其尾云：“妾辱之，子杀之义。”不顾妻子，兵溃死于难。著有《岩野集》。《南雄道中逢霍阶生》云：“病后无颜色，秋深有远行。渐于乡土隔，翻遣故人惊。归思珠江道，前途白下城。岭梅殊未发，贻赠若为情。”《重别叶公士》云：“大道风斯远，知音世所稀。他山情独切，两地梦俱飞。楚塞丹枫暗，吴门翠岫微。只凭文赋在，万里未相违。”又《绝命诗》云：“天造兮多艰，臣也江之浒。书生漫谈兵，时哉不我与。我后兮何之，我躬兮独苦。崖山多忠魂，后先照千古。”君子诵其诗而悲之。

公死后，一妾及二子和尹、虞尹皆被祸，仲子馨尹亦死乱军中，惟恭尹年十七，易服逃出。父执增城湛珩如于其家，为复壁以匿之。后以诗名，兼工书法。“山木萧萧风更吹，两崖风雨至今悲。一声杜宇啼荒殿，十载愁人拜古祠。海水有门分上下，江山无地限华夷。停舟我亦艰难日，愧向苍苔读旧碑。”即其舟泊崖山时作也，故其音独哀怨焉。其它佳句五言如“离忧在湘水，古色满衡阳。帆随南岳转，雁背碧湘飞”。七言如“桄榔过雨垂空地，玳瑁乘潮上古城。家山小别吟兼梦，水驿多情浪与风”。皆逼真唐人，无愧作者。恭尹字元孝，一字独漉。德庆王国宾题其集云：“四皓歌采芝，夷齐歌采薇。君今一卷诗，忠爱何依依。朋辈皆遗老，河山惟落晖。凄凉御琴曲，无泪更沾衣。”

一六 陈子龙

松江陈卧子子龙少出黄道周门，倜傥自负之士也。明末诗教浸衰，子龙出，一扫浮习，上追正始，时人比之枇杷晚翠，良非偶然。著有《白云草庐居》、《湘真阁》诸稿。《庐居》云：“行遁山河改，归来松菊荒。尚余三亩宅，无复万家旁。祈死烦宗祝，偷生愧国殇。但依亲陇在，含笑此高冈。”《钱塘东望有感》云：“清溪东下大江回，立马层崖极望哀。晓日四明霞气重，春潮三浙浪云开。禹陵风雨思王会，越国山川出霸才。依旧谢公携屐处，红泉碧树待人来。”《晚秋杂兴》云：“太行东出拥神京，古塞秋风右北平。笙鹤已辞沧海使，貂蝉初撤羽林兵。清霜玉沼芙蓉苑，旭日金铺翡翠城。鱼钥时传宣召急，侍臣通籍在承明。”《送吴稚峦司李桂林》云：“翡翠巢边匹马过，千盘桂岭郁嵯峨。南浮漓水啼猿满，北望君山落雁多。蛮府官闲能作赋，汉廷恩近忆鸣珂。愁心独系张平子，欲寄琅玕奈远何。”《边词》云：“八城亦是古辽西，大纛高牙万马齐。壮士锦衣行乐地，十年无梦到春闺。”《哭周立勋》云：“松柏西陵路，菖蒲北里花。春风夜台路，玉勒向谁家。”立勋字勒卣，几社六子之一也。其他警句如“左徒旧宅犹兰圃，中散荒园尚竹林。九龙移帐春无草，万马窥边夜有霜。九月星河人出塞，一城砧杵客登楼。四塞山河归汉阕，二陵风雨送秦师。石显上宾居柳市，窦婴别业在蓝田”，皆风格雄丽，不愧古作者。

乙酉南都陷，子龙起师据太湖，为规复中原计，乃一筹未展，骏雅与英雄共逝，辽鹤偕城土俱非，亦天实为之，莫之奈何也。侯方域吊公诗云：“长笺奏地下，端不欺杵臼。后死孰有为，成败事皆偶。断颈何足惜，固其含笑受。万卷识是字，文士非无守。从来诸轻薄，赖公重不朽。”诚哉！从来诸轻薄，赖公重不朽”矣。同里徐孚远、夏允彝皆少相友善，至是亦先后死国难。

一七 徐孚远

徐孚远字暗公，崇祯壬午举人，与卧子、彝仲诸君子倡几社于云间，其今古文词一时风靡海内。有《晓入京口》诗云：“猎猎风梢劲，惊流伏枕闻。晨钟下岩际，戎鼓列江滨。已辨南城树，新添北府军。乱离知未定，淹泊对孤云。”又《寻顾野王读书台》云：“入门禾黍动秋风，废院难支碧藓中。不及平原兄弟宅，尚余栗主寄花宫。”诗不多传。

一八 夏允彝

夏允彝字彝仲，由进士除长乐知县，补考功主事，南都亡，投池水死。公在几社中以经义擅长，诗非其专尚也。然《吊黄淳耀进士》一作，一字一泪，诵之凄然。诗云：“黄子不偶生，大雅寡谐俗。羽仪乍高翥，结绶匪所欲。黄云暗苍梧，北风号大陆。烽火满吴关，下邑势弥蹙。缅彼二三子，登陴

自踟躅。城郢既已乖，号秦又谁告。处死良独难，苟生何能淑。吁嗟烈士心，伯仲互相勸。威凤既在罗，耻与凡禽逐。未知没者悲，但见存者辱。存没两茫茫，思君不可赎。著有《幸存录》一卷。

一九 夏完淳诗辑

彝仲有子曰完淳，字存古，十五从军，十七授命磨盾草檄，虽一时名宿自愧弗如。《大哀》一赋尤足步武兰成。昔终童未闻善赋，汪锜不号能文，求之古人，殆难其匹。著有《玉樊集》、《南冠草续》、《幸存录》，录其古近体诗于此。《精卫》云：“惠风荡芳树，有鸟鸣中林。尾长羽翼短，衔石随浮沉。崇山日以高，沧海日以深。既无凌风姿，延颈振哀音。辛苦徒自力，慷慨谁为心。惜哉志不伸，道远固难任。滔滔东逝波，劳劳成古今。”《秋夜感怀》云：“登楼迷北望，沙草没寒汀。月涌长江白，云连大海青。征鸿非故国，横笛起新亭。无限悲歌意，茫茫帝子灵。”《送杜于皇归郢》云：“分手金陵道，相逢倍黯然。莺啼杨柳岸，人在木兰船。客路三千里，征衣十二年。计程归夏口，明月两回圆。”《即事》诗云：“复楚情何极，亡秦气未平。雄风清角劲，落日大旗明。缟素酬家国，戈船决死生。胡笳千古恨，一片月临城。战苦难酬国，仇深敢忆家。一身存汉腊，满目尽胡沙。落月翻旗影，清霜冷剑花。六军浑散尽，半夜起悲笳。”《春兴同钱大作》云：“上苑东风试早莺，故宫依旧百花明。江帆入镜移瓜步，朔马如云走石城。

金鼓平陵怜翟义，旌旗沧海葬田横。伤心终夜看牛斗，醉把吴钩万里行。池塘杨柳绿阴垂，烟雨飞花满院悲。三月晓迷吴苑路，万年春静禹陵碑。江潮夜夜呼精卫，草树山山哭子规。最是关情无限恨，胡笳偏向月中吹。河山风景泪堪挥，江上伤心对夕晖。蜀道尽悲诸葛死，汉家犹望少卿归。五湖义士莲花剑，七郡良家柳叶衣。结客少年情不浅，平林裘马放春围。建业河山万里遥，烟波天际出金焦。星辰夜隐移南极，江汉春翻锁北条。羽猎自高京口树，莺花不度广陵潮。琵琶马上愁胡语，青冢年年恨未消。”《忆侯几道云俱兄弟》云：“春城烟雾晓阴阴，俯仰斜阳吊古今。万里河山犹故国，九京风雨自同心。欲知真主观司隶，未见孤儿属羽林。鹤唳华亭人没后，河桥一阕泪沾襟。”《十二月十八立春》云：“可怜又是艳阳时，孤客征衫泣路歧。草木不欣秦正朔，衣冠犹想汉威仪。落梅入夜迎风急，细柳知春遇雨迟。闻道海南多王气，扶桑先浴万年枝。”《寒食杂作同钱二不识赋》云：“朔风广漠敝裘寒，客子飘零行路难。北首可怜秦郡县，南来无复汉衣冠。昭关去后难亡楚，沧海归时未报韩。袖里吴钩愁独倚，霜锋夜夜月中看。”《由丹阳入京》云：“万里河山拱旧京，楚囚西去泪如倾。斜风衰柳丹阳郭，细雨孤帆白下城。残梦忽惊三殿报，新愁翻觉一身轻。从军未遂平生志，遗恨千秋愧请缨。”其就义时尚自赋绝命诗三章，《寄母》云：“孤儿哭无泪，山鬼日为邻。古道麻衣客，空堂白发亲。循陔犹有梦，负米竟谁人。忠孝家门事，何须问此身。”《寄内》云：“忆昔结缡日，正当擐甲时。门楣齐阀阅，花烛夹旌旗。问寝谈忠孝，

袍学唱随。九原应待汝 珍重腹中儿。”又《寄荆隐女兄兼武功侯甥》云：“门阀推江左 孤忠两姓全。十年黄鹄咏 三载蓼莪篇。愧负文姬孝 深为宅相怜。大仇俱未报 赖尔后生贤。存古学有师 承兼秉父教。”

自彝仲殉国难 即以复仇自矢 故其所为诗文悲愤之气 不可遏抑焉。昔赵文□谓：“读汪水云诗而不坠泪者 殆不名人矣。”吾于存古诗亦云。

二〇 黄蕴生诗辑

嘉定黄蕴生淳耀性刚正，于书无所不读。及第后寄弟书云：“吾廷试传胪 与鼎甲先上殿 人皆啧啧称羨。吾此时叹息天地间自有为数千年一人，数百年一人者，今必不肯为数千百年之一人 而必欲为三年之一人 可怪也。”其自命不苟如此。当公在某抚军幕，某邑令囊数百金赂公父，令致书为左右 公复书云：“父生男之身 犹望生男之心 若行一不义，取一非有 男心先死矣 何以养父乎？”其不可侵犯如此。有《陶庵集》，《和陶饮酒》诗云：“朝光入山楼 栖鸟已惊喧。揽裘曝新阳，暖气无颇偏。仰视天宇清，得我檐前山。山中出岫云 变灭何时还。我心正惆怅 默与风铃言。”《和癸卯岁始春》云：“旧谷满场圃，知子良非贫。糟床注春醪，酬汝四体勤。开轩一笑粲 莫适为主人。莼牙花乳香 鲙缕银丝新。咄嗟行酒炙，童仆皆欣欣。中原有格斗，行子劳问津。不能济时代 甘与农圃邻。逝辞谢景夷 来就刘遗民。”《次韵酬别张

子石》云：“百丈牵江一线平 劳君客里念归程。即看去住谁能料 可是分离莫漫轻。白鸟背飞星子驿 朱旗遥颭石头城。船窗日把诗篇坐，香草含风处处生。”《留张贞白》云：“瓜庐小结在塘坳 城市翛然即远郊。谷为愚公宁避辱 亭因扬子不辞嘲。鸣蜩秋尽犹绿砌 舞燕春深亦认巢。莫爱云松栖绝壑，山中依旧要诛茅。”

我兵下苏州，公遂偕其弟渊耀、通政使侯峒曾、教谕龚用圆入嘉定，为城守计。迨城破，诣城城西僧舍就缢。主僧无等止之曰：“公未仕可勿尔也。”公曰：“城亡与亡，乃儒者分内事。”因取笔大书曰：“遗臣黄澍耀于弘光元年七月初四日自裁于西门僧舍。呜乎！进不能宣力朝廷，退不能洁身自隐，读书寡益，学道无成，耿耿不寐，此心而已。异日□氛复靖中华，士庶再见天日，论其世者当知予心。”书罢，顾视其弟渊耀已悬梁矣，遂缢于其侧死。

二一 龚用圆

龚用圆字智渊，方城破，抱其兄用广大恸曰：“我祖宗清白自矢，历三世矣。今日苟且图存，何面目见祖宗于地下？”遂共溺，两尸浮水面，犹握手不解。其弟用厚诸生也，初携妻子出避，寻亦自溺死。智渊著述颇富，惜散佚不传。《湖上遇同年朱子暇》云：“一见相携话旧游，湖光泛泛断桥头。寒烟迷却西泠路，还向当垆问酒楼。”